



Come un frac di impiegâts, ancje lui, al lave a cori ator dal cuartîr. Al faseve un zîr ator dal parc, po tal parc e daspó al tornave a cjase evitant lis stradis cun masse trafic par no incuinâ i palmons par salvâ il cûr.

Chel vinars sot sere, al veve sintût che alc i veve tocjât il cjâf. Po al veve viodût che al jere un corvat che a i jere passât masse dongje. Cussí al pensave tant che al continuave a cori ma al secont corvat a nol pensave plui le stesse robe parcè che il so sudôr che i vignive jù come une fontane al jere ros come un tocai. Alore al si jere mitût a cori te direzion di une cabine telefoniche ma prime che al si sedi sierât drenti, un altri a lu becape pe tierce volte.

Alà, sierât drenti come in tun confesionâl, al si jere gjavât le cjamesute par suiâsi il cjâf insanganât e al cjacarave di bessôl. In veretât al blestemave come che nol veve mai fat in vite sô parce che une vecjute che di fûr a jere daûr a scovâ il marcepît, a i cridave disint che al tirave a ciment chei puars ucei che no i vevin fat nuie e cuant che a veve capît che il sanc a nol jere il sanc dai ucei ma il sanc dal om, e veve fintramai zontât che a i stave ben e che a nol veve che di lâ a cori indulà che no 'nd ere ucei e no vignî acà a sporcjâ lis cabinis di chei altris., ma...

Te cjamare dal prin plan, il nevôt di chê none, a nol veve immó viodût nuie parcé che al jere masse ocupât sul ordenadôr. Te so pagjine di Facebook, a 'nd ere un titul di cronache: Nuovo suicidio in carcere "Il 28mo del 2010"

Emergenza penitenziaria. Ennesimo allarme

Alore al veve vierzût le pagjine. A jere le storie di un lâri che dopo vê stât condanât par une robarie a man armade, a nol veve podût tolerâ di stâ in preson e al si jere suicidât. I coments, a lavin ducj de stesse bande :

-A jere une vergogne!

-Puar diaul!

-Puar om.

-Gulp...

Al stave par zontâ le sô ma invezit al si jevà par lâ a cjalâ pal balcon. Ce sucedeval?

Doi dîs dopo ,un coridôr cun trê cerots tal cjâf al jessive dal parc e al passave sot di cjase.

Dopo une cjalade parom, l'incerotât al sparive da pè de strade tant che lui, al poiave le

sclope, al sierave il balcon e al sigurave sô none.

Jê, cun tune man incerotade a cjareçave il so cjan che, incerotât ancje lui, al menave le code sperant di vê inmó un corvat da mangjâ: chel dal lunis.

di Jaio Furlanâr
Conte n. 138

Par condividi:

Facebook

WhatsApp

Telegram

Print

Email